



№102 (9989)
26 желтоқсан
сейсенбі
2023 жыл

Жалағаш жаршысы



«zhalagash-zharshysy.kz»
ақпараттық агенттігі

Аудандық қоғамдық-саяси газет

Газет 1934 жылдың 10 қаңтарынан бастап шығады

Жәрмеңке: 121,9 тонна өнім сатылды

Сапалы өнім, қолжетімді баға. Өткен сенбіде күзгі молшылық керуені ауданнан облыс орталығына жол тартты. Дәстүрлі түрде өткізіліп жүрген ауыл шаруашылығы өнімдерінің жәрмеңкесінде жалағаштық ағайынның ала жаздай баптаған өнімдері қаладағы Ә.Қашаубаев пен Жетікөл көшесінің қиылысында, яғни Титов қыстағында шаһар тұрғындарына арзан бағада ұсынылды.



Таң сәріден басталған жәрмеңкеге келген халықтың қатары қалың. Қалтаны қақпайтың, шығынды ақтайтын сауданың қызғаны соншалық өнімдер түске дейін сатылып кетті. Себебі тауар өндірушілер тарапынан баға тұтынушыларға қолайлы, базар бағасынан әлдеқайда арзан болды.

Жәрмеңкенің боларын естіген соң таңмен таласып базарға картоп, сәбіз, пияз сынды өнімдерді арзан бағада қаптап алуға келдім. Қазір нарықтағы баға күн сайын өсіп жатыр. Сондықтан қалтаға салмақ салмайтын жәрмеңкеде жергілікті өнімдерден көбірек алуға тырысамын. Ауыл еңбеккерлеріне алғысым шексіз, бүгінгі жәрмеңкеде азық-түлік өнімдерінің түрі көп. Бастысы, халықтың қалтасына ауырлық түсірмей, нарықтағы бағадан 15-20 пайыз төмен сатуда. Жәрмеңкенің арқасында халық қыстың қамын молынан жасап алуда. Нарық заманында базар бағасынан арзан болатын бұндай жәрмеңкелердің халыққа берер пайдасы мол – дейді қала тұрғыны Гүлнар Сағындықова.

Айта кетейік, қала тұрғындарына жалағаштан 50 автокөлікпен 121,9 тонна өнім ұсынылды. Берекелі күз мезгілінің нәсібісі тасыған бұл күнде ауылдардан келген қауын-қарбыз бен бау-бақша өнімдері жоғары сұранысқа ие болды.

Иә, қауын-қарбыз десек, қала тұрғындары ойланбастан жаңадариялық ағайынның алқабындағы өнімді тұтынатыны рас. Себебі жыл сайын бақша өнімдерін баптаумен айналысатын жаңадариялықтардың сәресі жәрмеңкелерде бірінші таусылып қалады, бұл жолы да солай болды.

Кешегі жәрмеңкеде мұнан бөлек М.Шәменов, Бұқарбай батыр, Мәдениет, Қаракеткен ауылдық округтерінен келген мал азығы да халыққа арзан бағада ұсынылды. Т.Жүргенов ауылынан отандық брәндке айналған картоп пен «Құрманбай ата» алмасы халықтың көңілінен шықты. Сонымен қатар Ақсу, Еңбек, Аққұм, Есет батыр және Жаңаталап ауылдарынан қолжетімді бағада Сыр салысы жеткізілсе, Аққыр мен Мырзабай ахун ауылдарынан келген ет өнімдері арзан бағада сатылды.

Қала тұрғындары үшін жәрмеңке берекелі өтті десек те болады. Оның қызығы саудасында емес, берекесі мен молшылығында, жұртшылық күнделікті тұтынатын азық-түлік түрлерін базар бағасынан әлдеқайда төмен бағада таласып сатып алды. Осылайша ел нәсібісін молынан берген жәрмеңке бірнеше сағатқа созылып, қыс азығын қамдау үшін жәрмеңкені асыға күткен қала тұрғындарын риза етті.

Сезім НҰР

Бәрекеді!



Осы орайда жаңа жыл қарсаңында мерекені асыға күтетін оқушыларға арналған Президент шыршасын ұйымдастыру дәстүрге айналған. Жексенбіде өткен «Қош келдің, Жаңа жыл» атты Президент шыршасына аудандардан 200 бала шақырылды. Мерекелік іс-шарада облыс әкімі Нұрлыбек Нәлібаев Мемлекет басшысының бүлдіршіндерге арналған жаңажылдық құттықтауын жеткізді.

Бүгін республикамыздың барлық аймағында Президент шыршасы өтуде. Мемлекет басшысы өз сөзінде «Мен өскелең ұрпақтың болашағына баса мән беремін. Жастарға зор үміт артамын. Олардың арасында көзі ашық, көкірегі ояу, ойы ұшқыр азаматтар аз емес. Жастарымыз атқарып жатқан ауқымды жұмыстың, реформалардың игілігін міндетті түрде көреді. Біз өскелең ұрпаққа жол

ашу үшін барлық жағдай жасауымыз керек. 31 жыл бұрын бастау алған ҚР Президентінің шыршасына осы уақытқа дейін біздің өңірден 4 мыңға жуық бала қатысты. Еліміздің басты шырша тойын мерекелеу үшін сіздер де облысымыздың әр ауылынан келдіңіздер. Бұл салтанатты шара – Президентіміздің өздеріңдей өскелең ұрпаққа көрсеткен құрметі, – деді аймақ басшысы.

Шыршаға келген аймағымыздың оқушылары өнерге бай, жан-жақты екен. Оқушылар әртүрлі қызықты ойын ойнап, ән шырқады, театрландырылған қойылым тамашалады және естелік сыйлық алды. Сондай-ақ қонақтарға арнайы фотосессия ұйымдастырылды.

Айта кетейік, ауданнан Президент шыршасына 9-13 жас аралығындағы 9 оқушы барып, мерекелік концертті көріп қайтты. Әрине мерекелік шыршаға бару оңай емес. Жыл бойы үздік оқыған, тәрбиесі оңды, сондай-ақ кепбалалы отбасында тәрбиеленетін, қорғаншылық және қамқоршылықтағы балалар жолдама алған.

ЖАЛҒАСЫ 2-БЕТТЕ.

Мәселе

Интернет құнын өсіру кімдерге тиімді?

Жаз айларында Цифрлық даму министрі Бағдат Мусин интернет құны арзан 20 елдің қатарына кіретінімізді айтқан. Осы мәлімдемеден кейін ұялы байланыс операторлары тариф бағасын көтеріп жіберді. Сол уақытта «Ookla» деректеріне сәйкес, Қазақстанда 4G қолжетімділігі 84,5 пайызды құраған, ал 5G енді енгізілуде.

Десе де Қазақстанда интернет сапасына қатысты тұтынушылар тарапынан әлі де шағым азаяр емес. Мемлекет басшысы да жауапты министрге мәселенің шешіміне қатысты сұрақ қойған. Ал Бағдат Мусин интернет жылдамдығының тым төмендігін тариф құнының арзандығымен байланыстырды.

Арзан байланыс операторлар үшін тиімді емес екенін түсіну маңызды. Бұл – бизнес, сондықтан бизнесті дамыту, яғни желіні құру және сапаны жақсарту үшін инвестициялар қажет. Кіріспен бірге инвестициялар келеді. Егер табыс төмен болса, даму үшін инвестиция құйылмайды, тиісінше сапа да болмайды. Әлеуметтік желілердің дамуына байланысты елде трафикті тұтыну бірнеше есе өсті. Бұл нәтиже білдіреді? Бұл операторлар желісіндегі жүктеме де артты деген сөз. Бірақ шығындар тұтынылатын трафиктің көлеміне сәйкес төле-тең түрде өскен жоқ. Қазақстанда мобильді трафикті тұтыну бойынша жетекші елдердің бірі және мобильді желіні қолдану жағынан да алдыңғы қатарда, – дейді министр.

Бағаның өсуін ұялы байланыс операторлары тұтынушыларға сапалы қызмет көрсетумен байланыстырды. Алайда бағаның бірден өскеніндей интернет жылдамдығы да жақсарған жоқ.



«Ookla» компаниясы әлемнің әртүрлі елдеріндегі интернет жылдамдығын зерттеп, рейтингін шығарды. Мобильді интернет жылдамдығы бойынша Қазақстан орташа есеппен 35,49 Мбит/с көрсеткішпен 67 орынға тұрақтады. Ал тіркелген интернет жылдамдығы бойынша еліміз 51,41 Мбит/с көрсеткішпен 94 орында.

324,92 Мбит/с жылдамдықпен БАӘ мобильді интернет жылдамдығы бойынша көш бастап тұр. Одан кейінгі орындарға Қытай (161,56 Мбит/с), Норвегия (153,18 Мбит/с), Дания (147,03 Мбит/с), Оңтүстік Корея (136,40 Мбит/с) және Нидерланды (122,94 Мбит/с) жайғасқан. Тіркелген интернет жылдамдығы

бойынша жетекші елдердің ондығына Сингапур (263,51 Мбит/с), Гонконг (259,02 Мбит/с), Чили (249,82 Мбит/с), Қытай (248,92 Мбит/с), Монако (247,37 Мбит/с), БАӘ (239,40 Мбит/с), Исландия (226,05 Мбит/с), АҚШ (219,71 Мбит/с), Таиланд (216,26 Мбит/с), Дания (209,52 Мбит/с) кірді.

Қазақстанда 6 406 елді мекен бар, оның 6 290-ы – ауыл. Өкініштісі, еліміздің 1 432 ауылында мобильді интернет жок. Қазіргі таңда 116 қала мен 4 858 ауыл 3G (2 813 ауыл) және 4G (2 045 ауыл) мобильді технологияларымен интернетке қол жеткізіп отыр. Сондай-ақ ADSL технологиясы бойынша интернетпен 1 950 ауыл және тал-

шықты-оптикалық байланыс желілері технологиясымен 2606 ауыл қамтылған. Елде 1432 ауылдың мобильді интернетсіз қалғанын министрлік те жоққа шығармады. Оның 504-ін быылдан бастап спутниктік жүйелер арқылы қамтамасыз ету қарастырылып жатыр.

Министрлік Үкіметтің «Қолжетімді Интернет» ұлттық жобасын бекіткенін, оның аясында 2024-2027 жылдары талшықты-оптикалық байланыс желілері арқылы 3 мыңнан астам ауылды, оның ішінде мобильді интернеті жоқ 928 ауылды интернетпен қамту жоспарланғанын айтты. Жалпы ұлттық жобаны іске асыру үшін 1 499,9 млрд теңге қарастырылған.

ЖАЛҒАСЫ 2-БЕТТЕ

«Газет – халықтың көзі, құлағы һәм тілі»

Ахмет Байтұрсынов



Қадірлі оқырман!

Мерзімді басылымдарға 2024 жылдың I жартыжылдығына жазылу басталды. Ел жаңалығын білгіңіз келсе, сүйікті газетіңізден қол үзеңіз.



